

Datum: 19.5. 2026.

Broj: 02-06-1060

PRAVOSUĐE SE POVLAČI PRED KORUPCIJOM: VIŠE OD POLOVINE PRIJAVA ZA KORUPCIJU BEZ ISTRAGE

Banja Luka, 19. maj 2026. godine – Više od polovine prijava za korupciju završava naredbom o nesprovođenju istrage, dok se gotovo 30% istraga obustavi nakon pokretanja što najbolje oslikava nespremnost BH pravosuđa za borbu protiv korupcije, te direktno utiče na drastičan pad povjerenja građana u pravosudne institucije.

U 2025. godini zabilježen je pad udjela broja prijava za korupcijska krivična djela sa 5.2 na 5.05% od ukupnog broja prijava, dok je ukupan broj krivičnih prijava u porastu. U isto vrijeme, broj prijava visoke korupcije tokom prethodne godine **manji je za 30%** u odnosu na 2023. i 2024. godinu, pokazuje najnovija **analiza procesuiranja korupcije pred sudovima i tužilaštvima u Bosni i Hercegovini u 2025.** koju je Transparency International u BiH (TI BiH) uradio na osnovu zvaničnih podataka Visokog sudskog i tužilačkog vijeća (VSTV BiH).

Ovi porazni podaci o neefikasnosti u suzbijanju korupcije direktna su posljedica neusvajanja ključnih reformskih zakona koji su neophodni za integritet pravosuđa ali i očigledne opstrukcije reformskih procesa, zahvaljujući čemu je BiH svrstana među [četiri najkorumpiranije države u Evropi](#). Višegodišnja stagnacija reformi, zarobljenost institucija, [manjak transparentnosti](#) ali i odbijanje da se procesuiraju neke od najvećih korupcijskih afera u koje su umiješani čak i najviši nosioci pravosudnih funkcija, umanjuje ionako loše povjerenje građana u spremnost pravosuđa da se suoči sa korupcijom.

Utemeljenost ovih ocjena ali i pokazatelj sve lošijeg stanja u pravosuđu najbolje ilustruje konstantno smanjenje broja istraga za korupcijska krivična djela, sa 618 u 2016. godini na 359 u 2025. godini, što je pad za čak 43% u zadnjoj deceniji.

Pad broja otvorenih istraga za ova djela naročito je primijetan u tužilaštvima Federacije BiH i Brčko Distrikta, a visok **udio obustavljenih istraga u svim tužilaštvima** (28,5%) upućuje ne samo na ozbiljne probleme u fazi prikupljanja dokaza već i upotpunjuje sliku **pravosuđa koje se povlači** i koje nije u stanju da se adekvatno suprotstavi korupciji u zemlji.

Kada je riječ o optužnicama, **samo 1,4% svih optužnica podignutih u 2025. godini odnosi se na korupciju** dok se od ukupno 144 podignute optužnice za korupcijska krivična djela, tek njih 5 (odnosno 3,4%) odnosi na djela visoke korupcije, odnosno na zloupotrebe položaja najviših zvaničnika vlasti kojima se stiče višemilionska korist na štetu države.

Čak i u rijetkim slučajevima koji dopijaju pred sud, sve više optuženih biva oslobođeno što je posebno vidljivo u slučajevima visoke korupcije, gdje je od 28 donesenih sudskih odluka 17 bilo osuđujućih, dok

gotovo **40% čine oslobađajuće ili odbijajuće presude**. Kod suđenja za ostala korupcijska krivična djela koja se ne odnose na visoku korupciju, prosjek oslobađajućih i odbijajućih presuda je znatno manji i iznosi oko 28%.

Dodatni udarac vladavini prava predstavlja **izrazito blaga kaznena politika** pa tako 43% osuđenih za korupciju dobija uslovne kazne, dok se zatvorska kazna izriče u **manje od polovine slučajeva**. Osim što ne stvara nikakav preventivni efekat, ovakvom praksom pravosuđe šalje jasnu poruku da je korupcija isplativa i da će **proći nekažnjeno**.

Ovakvom poraznom stanju u procesuiranju korupcije doprinose i neuspješni napori da se eliminiše politički uticaj kroz ključne reformske zakone, što je posebno bilo vidljivo kroz krajnje neefikasan i **netransparentan proces usvajanja novog Zakona o VSTV-u**. Ukoliko bude usvojeno predloženo rješenje ono i dalje neće ispunjavati ključne [preporuke Venecijanske komisije](#), jer i dalje sadrži mehanizme kroz koji izvršna vlast nastoji zadržati političku kontrolu nad pravosudnim sistemom.

Posebno je važno napomenuti da su nedovoljno precizne odredbe o sprečavanju sukoba interesa, kao i neefikasnost imehanizama za prijavu i provjeru imovine sudija i tužilaca, čija se primjena direktno opstruiše, otvorile prostor za **blokadu procesa** depolitizacije pravosuđa.

TI BiH upozorava da je hitno potrebno unaprijediti rad tužilaštava i sudova, poboljšati kvalitet istraga i optužnica, te uvesti strožiju kaznenu politiku. Bez ovih promjena i bez povećanja transparentnosti rada institucija, nemoguće je očekivati da građani ponovo steknu povjerenje u pravdu, a Bosna i Hercegovina će i dalje ostati na samom dnu u suzbijanju korupcije i jačanju vladavine prava.



2000 - 2025

Udruženje za borbu protiv korupcije Transparency International u BiH
Reg. Br. UP08-07-1-616/11, Ministarstvo pravde BiH, Sarajevo

Sjedište: Krfska 64e, 78000 Banja Luka, Tel/Fax +387 51 216 369, 216 928, 224 521, 224 520
Ispostava: Zmaja od Bosne 20/1, 71000 Sarajevo, Tel/Fax +387 33 220 049, 220 047
E-mail: info@ti-bih.org
Web: www.ti-bih.org